

### **Qhov Kev Kawm Cov Hom Phiaj (Course Goals):**

Zoo Siab Txais Tos Koj los Ua Ib Tus Neeg Yus Muab Tswv Yim Pab Yus Tus Kheej (Self-Advocate)! Nyob hauv qhov kev kawm no koj yuav kawm kom paub txog:

- ❖ Cov lus siv rau tus mob xiam oob qhab
- ❖ Tshawb nrhiav kom paub txog koj tus mob thiab cov kev pab uas koj xav tau
- ❖ Tshawb nrhiav kom paub cov hauj lwm koj nyiam ua hauv lub neej
- ❖ Kawm kom paub cov cai lij choj thiab koj cov cai
- ❖ Tsim kom tau cov hom phiaj
- ❖ Npaj rau txoj kev kawm ntawv thiab ua hauj lwm

Thaum koj ua tiav lawm, koj yuav paub zoo dua qub seb yuav ua li cas thiaj kawm tau ntawv thiab ua tau hauj lwm zoo!

### **Nco Cia!**

Qhov kev kawm no yog tsim los pub rau koj nyeem ntawv raws li koj rab peev xwm ua tau nrawm los tau qeeb. Koj yeej rov qab mus saib tau koj cov ntawv yog hais tias koj xav rov qab mus saib seb yog li cas lawm.

### **Tshooj (Chapter) 4: Lub Teb Chaws thiab Xeev Cov Cai Lij Choj hais txog Cov Neeg Muaj Mob Xiam Oob Qhab**

Zoo Siab Txais Tos Koj Rov Qab Los! Puas nco qab kuv lawm, Ms. Jordan? Nyob hauv daim slide no koj yuav ntsib kuv tus khub, Ms. Jackson. Koj npe hu li cas?

### **Lub Ntsiab Lus:**

Yuav kom koj ua tau ib tus yus muab tswv yim pab yus tus kheej (self-advocate), ua ntej tshaj plaws koj yuav tsum to taub txog cov cai lij choj uas tiv thaiv cov neeg muaj tus mob xiam oob qhab.

### **Kev Kawm Cov Hom Phiaj:**

- ❖ Ua kom koj paub txog cov cai lij choj no:
  - ✓ Americans with Disabilities Act (ADA)
  - ✓ Individuals with Disabilities Education Act (IDEA)
  - ✓ Section 504 of the Rehabilitation Act
  - ✓ Section 508 of the Rehabilitation Act
  - ✓ Family Educational Rights and Privacy Act (FERPA)
- ❖ Muab IDEA thiab ADA Los Sib Piv

**Ib cov lus siv (terms) tseem ceeb uas koj yuav tau to taub ntsig txog tsab cai lij choj yog dab tsi?**

### **Cov Lus Siv Ntsig Txog Tsab Cai Lij Choj**

**Kev Ntsuam Xyuas Txog Kev Kawm Ntawv (Educational Evaluation):** Ib qho *kev ntsuam xyuas txog kev kawm ntawv* yog muab ua tiav nyob hauv tsev kawm ntawv kom paub seb tus me nyuam kawm ntawv muaj tus mob xiam oob qhab dab tsi los tsis muaj. Qhov kev ntsuam xyuas no yog muab ua kom paub seb tus me nyuam kawm ntawv puas yuav muaj feem tau txais qhov kev kawm ntawv tshwj xeeb rau cov me nyuam muaj ib tus mob (special education) thiab lwm cov kev pab. Qhov kev ntsuam xyuas no kuj tseem yog muab ua kom tiav kom paub txog qhov kev kawm ntawv uas yuav pab tau tus me nyuam kawm ntawv.

**Kev Hloov Kho (Modifications):** Muaj *kev hloov kho* txhais hais tias muab kev kho, ua kom qis los yog txo cov kev kawm kom tsawg rau tus me nyuam kawm ntawv.

**Kev Cuag Tau (Access):** Kev *cuag tau* yog txoj cai mus muab tau, siv tau los yog nrhiav tau ib yam dab tsi (xws li cov kev pab los yog kev ua tswv cuab).

**Ris Lub Nra (Undue Burden):** *Ris Lub Nra* yog ib yam dab tsi uas muab txoj kev nyuaj los yog raug nyiaj ntau rau ib lub chaw ua hauj lwm los yog ib lub koom txoos.

**Cais Neeg Tsis Raws Cai (Discrimination):** *Kev cais neeg tsis raws cai* yog ib yam ua tsis ncaj rau ib tus neeg los yog ib pab pawg twg los ntawm qhov lam ntxub los yog muaj lub tswv yim xav phem rau lawv.

**Tsab Cai Section 504:** *Tsab Cai Section 504* yog ib tsab cai lij choj tiv thaj tib neeg txoj cai uas txwv tsis pub cais ib tus neeg twg uas muaj mob xiam oob qhab yam tsis raws cai. Tsab Cai Section 504 ua kom paub tseeb tias ib tus me nyuam uas muaj mob xiam oob qhab tau txais txoj kev kawm ntawv sib npaug ib yam li lwm tus.

**Affirmative Action:** *Affirmative Action* yog hais txog cov cai ua hauj lwm ntsig txog haiv neeg, pab pawg neeg, poj niam/txiv neej los yog kev muaj mob xiam oob qhab uas yog txhawb kom sawv daws muaj vaj huam sib luag rau txoj kev tau hauj lwm ua thiab tau txais kev pab.

**ADA Amendment of 2008:** *Tsab Cai Americans with Disabilities Act (ADA)* tau muab kho dua tshiab hauv xyoo 2008 kom muaj lo lus txhais nthuav dav ntxiv hais txog ib tus neeg muaj mob xiam oob qhab.

Okay, tsam no koj paub ib cov lus siv rau qhov no lawm, nws yog lub sij hawm los mus kawm kom paub meej ntxiv hais txog koj cov cai (rights) thiab cov luag hauj lwm (responsibilities) nyob hauv txoj cai. Nco ntsoov sau tej qhov tseem ceeb cia thaum peb tham txog qhov no – vim peb yuav siv cov lus no los mus ua ib qho jeopardy ib me pliag tom ntej no.

## **Cov Neeg Muaj Mob Xiam Oob Qhab: Cov Cai thiab Cov Luag Hauj Lwm:**

### **Cov Cai Lij Choj**

#### **Tsab Cai Family Educational Rights and Privacy Act (1974) – FERPA:**

- ❖ Pub rau **cov me nyuam kawm ntawv** mus saib los yog muab tau nws tus kheej cov ntaub ntawv khaws cia hais txog kev kawm ntawv (**tsis yog niam thiab txiv**).
- ❖ Pub rau **cov kws qhia ntawv them siab (postsecondary teachers)** saib tau cov me nyuam kawm ntawv cov ntaub ntawv hais txog kev kawm ntawv.
- ❖ Tab sis cov kws qhia ntawv **tsis** muaj cai saib tau cov ntaub ntawv ntsig txog tus mob xiam oob qhab.

#### **Tsab Cai Individuals with Disabilities Act – IDEA 2004:**

- ❖ Ua kom paub tseeb tias **tas nrho** txhua tus me nyuam kawm ntawv uas muaj mob xiam oob qhab mus kawm tau tsoom fwm ib qho kev kawm ntawv yam tsis tau them nyiaj (free appropriate public education, FAPE).
- ❖ Hais kom cov tsev kawm ntawv yuav tsum tau npaj cov me nyuam kawm ntawv rau txoj kev kawm, kev ua hauj lwm thiab kev nyob tau tsis tom lwm tus pab – tom qab kawm tas high school.
- ❖ Kom cov tsev kawm ntawv yuav tsum muab kev pab kom tau raws li tus me nyuam kawm ntawv tus kheej cov kev xav tau.

#### **Tsoom Fwm Qhov Kev Kawm Ntawv Tsis Tau Them Nyiaj (Free Appropriate Public Education, FAPE) yog txhais li cas? Cov kev pab uas muaj ntsig txog qhov no yog dab tsi?**

#### **Raws li hais rau hauv tsab cai IDEA, cov tsev kawm ntawv yuav tsum:**

- ❖ Tiv thaiv cov me nyuam kawm ntawv txoj cai kom tau ib qho kev kawm ntawv tsis tau them nyiaj thiab phim rau nws rab peev xwm kawm tau.
- ❖ Muab kev lav loos rau txoj cai ntawm kev kawm ntawv kom txog rau thaum tus me nyuam kawm ntawv kawm tiav, ua tau raws li nws cov hom phiav ntawm daim IEP (Individual Educational Plan) los yog thaum nws nto hnuv nyoog 21 xyoos.
- ❖ Muab kev ntsuam xyuas thiab tsim kom tau ib daim phiav IEP.
- ❖ Muab cov kev pab thiab sau tus me nyuam kawm ntawv kev siv qhov kev pab cia rau hauv ntaub ntawv.

### **Yuav kom muaj feem tau txais kev pab raws li hais rau hauv tsab cai IDEA:**

- ❖ Tus me nyuam kawm ntawv yuav tsum muaj ib tus mob xiam oob qhab – muaj teeb meem tsis hnov lus zoo, muaj tus mob autism, lag ntseg-dig muag, muaj teeb meem kev nyuaj siab, mob hlwb ruam qauj, muaj ntau yam teeb meem, muaj teeb meem rau tej qij pob txha, lwm yam teeb meem mob nkeeg, kawm tsis tau ntawv, muaj teeb meem hais lus, raug mob rau cov paj hlwb, tsis pom kev zoo los yog qhov muag tsis pom kev.

#### **THIAB**

- ❖ **YUAV TSUM** yog xav kom tau kev pab kawm ntawv tshwj xeeb (special education) thiab lwm yam kev pab kom tau txais ib qho kev pab hais txog kev kawm ntawv los ntawm tsev kawm ntawv.

### **Tsab Cai Americans with Disabilities Act (ADA) of 2008:**

- ❖ Tsis pub tsoom fwv cov kev pab cuam cais ib tus neeg twg yam tsis raws cai los yog tshem ib tus neeg twg uas muaj mob xiam oob qhab tawm ntawm qhov kev pab cuam vim nws muaj ib tus mob xiam oob qhab.

### **Tsab Cai Rehabilitation Act – Section 504 & Section 508:**

- ❖ Section 504 – tsis pub cov tsev kawm ntawv **tshem tawm** ib tus neeg uas muaj mob xiam oob qhab kom nws tsis tau koom rau hauv cov kev pab cuam uas tau nyiaj los ntawm tsoom fwv teb chaws.
- ❖ Section 508 – fab saib xyuas hauj lwm ntawv tsoom fwv / cov chaw ua hauj lwm yuav tsum muab cov kev pab kom siv tau lub computer thiab tej ntaub ntawv rau cov uas muaj ib tus mob xiam oob qhab los tsis muaj.

### **Tsab Cai ADA thiab Rehabilitation Act:**

Cov tsev kawm ntawv qib siab (postsecondary schools) yuav tsum:

- ❖ Tiv thaiv kom sawv daws muaj txoj cai mus kawm tau ntawv
- ❖ **Muab kev pab kom mus cuag tau txoj kev kawm ntawv**, tsis yog qhov kev kawm ntawv

**Kom Muaj Feem Tau Txais Kev Pab raws li hais rau hauv tsab cai ADA/Section 504:**

- ❖ Tsis hais leej twg uas muaj teeb meem mob rau lub cev los yog mob hlwb uas ua rau nws ua tsis tau ib txoj hauj lwm loj hauv lub neej los yog ntau txoj: xws li kev tu tus kheej, siv ob txhais ua hauj lwm, mus kev, pom kev, hnov lus, hais lus, ua pa, kawm ntawv thiab ua hauj lwm.
- ❖ Ib tus neeg uas muab xam tau tias nws muaj ib tus mob xiam oob qhab yog hais tias nws muaj ib tus mob xiam oob qhab, muaj ntaub ntawv tias muaj ib tus mob xiam oob qhab los yog muab xam tias muaj ib tus mob xiam oob qhab.

**Tsab cai IDEA txawv ntawm tsab cai ADA li cas? Peb yuav piv seb tsab cai IDEA ua hauj lwm li cas nyob hauv K-12 mus rau tsab cai ADA ua hauj lwm li cas nyob hauv cov tsev kawm ntawv qib siab (postsecondary).**

**Qhov sib txawv ntawm kawm hauv K-12 thiab kawm hauv college:**

<b>K-12 - IDEA – Section 504</b>	<b>College – ADA – Section 504</b>
Tsev Kawm Ntawv (District) qhia kom paub tus (cov) me nyuam kawm ntawv	Tus me nyuam kawm ntawv thov thiab tus kheej qhia tawm
Tsev Kawm Ntawv (District) ua kom tiav qhov kev txheeb xyuas (assessment)	Tus me nyuam kawm ntawv muab cov ntaub ntawv
Tsev Kawm Ntawv (District) tsim kom muaj qhov muaj feem tau txais kev pab (eligibility)	Tus me nyuam kawm ntawv qhia paub txog cov kev kawm tsis tau ntawv
Tsev Kawm Ntawv tsim kom tau ib daim phiaj IEP	Tus me nyuam kawm ntawv thov kev pab txhawb thiab/los yog thov kom muab cov hoob kawm tshwj xeeb (special classes)
Tsev Kawm Ntawv (District) muab kev pab txhawb thiab/los yog muab cov hoob kawm tshwj xeeb (special classes)	Tus me nyuam kawm ntawv muaj lub luag hauj lwm rau nws tus kheej cov hom phiaj thiab kev nce qib
Tsev Kawm Ntawv (District) ua kom paub tseeb tias tau muab daim phiaj IEP siv ua hauj lwm thiab ua tau raws li cov hom phiaj	Tus me nyuam kawm ntawv muab tswv yim rau tus kheej
Cov niam cov txiv thiab cov kws tshaj lij qhia ntawv yuav pab tau tswv yim rau tus me nyuam kawm ntawv	Cov kev pab <b>yuav hloov tsis tau</b> cov kev kawm tau credit, kawm kom tau degree los yog ntawv pov thawj (certificate)

Puab muaj kev hloov (alternation) rau qhov kev pab cuam thiab cov kev qhia ntawv	Tus me nyuam kawm ntawv muab neeg nrog pab (attendant care)
Tus me nyuam kawm ntawv tau txais daim ntawv pov thawj kawm tiav (certificate of completion) tsis yog daim diploma	Tus me nyuam kawm ntawv muab tsheb thauj mus los nws tus kheej
Tsev Kawm Ntawv (District) muab neeg nrog pab xa tus me nyuam mus kawm ntawv	
Tsev Kawm Ntawv (District) muab tsheb pab thauj mus tom tsev kawm ntawv thiab rov los tsev	

Wow, peb tau hais ntau yam heev los lawm saum no. Txhob nyuaj siab, koj rov qab mus saib tau txhua lub sij hawm. Ib qho ntxiv, nws muaj ntau qhov chaw uas muab los ntawm Wisconsin Department of Public Instruction (DPI) rau koj mus xyuas ib txhia ntaub ntawv uas peb tau kawm los.

Txuas mus rau Opening Doors to Postsecondary Education and Training Handbook:

<https://dpi.wi.gov/sites/default/files/imce/sped/pdf/tranopndrs.pdf>

**Cov lus teb rau ntawm qhov rov xyuas dua (review) thiab Appendix A cov lus nug muaj nyob rau ntawm pab 12-14.**

**Cia Peb Rov Mus Xyuas Dua:**

**IDEA**

1. IDEA yog txhais li cas?
2. IEP yog dab tsi?
3. Tsab cai IDEA yog hais txog cov me nyuam kawm ntawv hnuv nyoog li cas?
4. Ob yam uas ib tus me nyuam kawm ntawv yuav tsum tau muaj xwv thiaj muaj feem tau txais kev pab raws li hais rau hauv tsab cai IDEA yog dab tsi?

**ADA**

1. ADA yog txhais li cas?
2. **Yog los Tsis Yog.** Puas yog cov tuam tsev kawm ntawv qib siab (postsecondary institutions) los yog cov chaw ua hauj lwm hais kom yuav tsum muaj ib daim IEP?

3. Dab tsi uas yuav tsum tau muaj xwv kom thiaj tau txais kev pab tiv thaiv hauv tsab cai ADA?
4. Raws li tsab cai ADA, leej twg yog tus muab cov ntaub ntawv hais txog ib tus neeg tus mob xiam oob qhab?

### **504/508**

1. Sections 504 & 508 yog ib feem ntawm tsab cai twg?
2. Sections 504/508 siv tau rau leej twg?
3. Section 508 hais txog dab tsi?
4. Raws li Section 508, tsoom fwv cov chaw ua hauj lwm uas tau txais tsoom fwv teb chaws cov nyiaj pab yuav tsum tau muab dab tsi?

### **Piv K-12 rau College**

1. Nyob rau ntawm theem high school, lub tsev kawm ntawv yog tus muaj lub luag hauj lwm qhia kom paub cov kev pab rau tus me nyuam kawm ntawv kom nws kawm tau ntawv. Nyob hauv cov tuam tsev kawm ntawv qib siab (postsecondary institutions) los yog nyob tom txoj hauj lwm, leej twg yog tus ua qhov no?
2. Yog hais tias ib tus neeg ua hauj lwm/me nyuam kawm ntawv tau raug muab cais yam tsis raws cai (discriminated against), tsoom fwv qhov chaw ua hauj lwm lub twg yog lub hu tau rau kom nrog txhawb xyuas txog qhov teeb meem no?
3. **Yog los yog Tsis Yog.** Cov tuam tsev kawm ntawv qib siab (postsecondary institutions) yuav tsum muab cov ntawv qhia txog qib kawm (grade reports) rau cov niam cov txiv.
4. Yog hais tias ib tus neeg ua hauj lwm/me nyuam kawm ntawv nyob rau theem kawm ntawv qib siab (postsecondary level) los yog ntawm txoj hauj lwm xav tau ib tus neeg nrog pab (attendant), leej twg yog tus muab qhov no?

Ua tau zoo kawg!

Tsam no kuv xav pom koj muab ib txhia tswv yim no los mus siv. Siv Appendix A (muab tom ua ke rau nram qab kawg ntawm daim ntawv no) ntawm phau me nyuam ntawv “Opening Doors”, es teb rau cov lus nug nram qab no:

1. Tsab cai Individuals with Disabilities Education Act (IDEA) hais kom cov tsev kawm ntawv K-12 yuav tsum muab kev pab rau cov me nyuam kawm ntawv uas muaj mob xiam oob qhab raws li lawv \_\_\_\_\_?

2. IEP yog txhais li cas?
3. Thaum twg yog thaum cov kev pab (cov kev pab muaj cai tau txais) rau tsab cai IDEA los xaus tsis muaj rau lub tsev kawm ntawv thiab tus me nyuam kawm ntawv?
  - a) Thaum tus me nyuam kawm ntawv nto hnuv nyoog 21 xyoos
  - b) Thaum muab cov hauj lwm kawm tas high school ua tiav tas thiab tus me nyuam kawm ntawv tau txais nws daim high school diploma
  - c) Yog a los yog b
  - d) Yog a thiab b ob qho tib si
4. Theem kawm qib siab (postsecondary) yog dab tsi?
5. ADA yog txhais li cas?
6. Section 504/ADA hais txog tsib (5) yam uas cov tsev kawm ntawv colleges los yog universities yuav tsum ua kom tau thaum lawv muab kev pab rau cov me nyuam kawm ntawv muaj mob xiam oob qhab. Siv koj tus kheej cov lus, hais kom tau tsib (5) yam no seb yog dab tsi. Nco ntsoov, koj mus saib tau Appendix A.
7. Thaum koj kawm nyob high school, peb (3) lub luag hauj lwm (responsibilities) ntawm koj uas yog ib tus me nyuam kawm ntawv muaj mob xiam oob qhab yog dab tsi?
8. Thaum koj hnuv nyoog nto 18 xyoos thiab/los yog kawm tas high school lawm, nram qab no qhov twg yog koj lub luag hauj lwm? Xaiv **tas nrho** cov uas hais raug.
  - a) To taub txog koj tus ob xiam oob qhab thiab muab kom tau cov ntaub ntawv tam sim no.
  - b) Muab tswv yim sawv cev koj tus kheej.
  - c) Hu rau cov neeg ua hauj lwm muab kev pab/kev pab rau tus mob xiam oob qhab nyob rau ntawm lub tsev kawm ntawv college/university.
  - d) Qhia rau cov kws qhia ntawv paub txog cov kev pab (accommodations) uas yuav tsum tau muaj rau koj.
  - e) Npaj kom tau cov kev pab ntawd uas tsis muaj nyob rau ntawm cov tsev kawm ntawv qib siab (secondary setting).

9. Cov kev pab (accommodations) twg nram qab no yog cov uas ib lub tuam tsev qhia ntawv qib siab (postsecondary) yuav muaj muab?
  - a) Kev pab tswv yim tshwj xeeb.
  - b) Assistive technology.
  - c) Cov ntawv xeeb uas yooj yim dua thiab homework.
  - d) Audio textbooks.
  - e) Cov neeg teev ntawv, cov neeg nyeem ntawv thiab cov neeg txhais lus.
10. University of Wisconsin System muaj cov tuam tsev qhia ntawv 4 xyoos tsawg lub?
11. University of Wisconsin System muaj cov tuam tsev qhia ntawv 2 xyoos tsawg lub?
12. Muaj pes tsawg lub colleges uas tsis yog tsoom fwm li (private colleges) thiab universities nyob hauv Wisconsin?
13. Muaj pes tsawg lub technical colleges nyob hauv Wisconsin?

Ua tau zoo heev!

Koj twb ua yuav luag tiav Tshooj (Chapter) 4 hais txog qhov Ua Ib Tus Neeg Yus Muab Tswv Yim Pab Yus Tus Kheej (Self-Advocate). Ua ntej koj mus ntxiv rau qhov tom ntej, siv sij hawm me ntsis los mus xav txog seb dab tsi uas koj tau kawm los nyob hauv tshooj no. Thiab tseeb tiag koj yuav rov qab mus saib tau tshooj no txhua lub sij hawm yog koj xav rov mus xyuas ib qho dab tsi ntxiv. Nco ntsoov ceev qhov koj ua tau zoo mus ntxiv!

### **Thov Qhuas Koj:**

Tsam no koj tau ua tiav Tshooj (Chapter) 4 ntawm qhov ua ib Tus Neeg Yus Muab Tswv Yim Pab Yus Tus Kheej (Self-Advocate). Nco ntsoov mus ua kom tiav daim ntawv soj ntsuam (survey) rau Tshooj 4 nyob rau ntawm phab ntawv soj ntsuam.

Ua Ib Tus Neeg Yus Muab Tswv Yim Pab Yus Tus Kheej (Becoming a Self-Advocate)  
Tshooj (Chapter) 4 – Cov Cai Lij Choj

**Nias rau ntawm qhov txuas hauv qab no thaum koj npaj tau txhij los mus ua kom tiav daim ntawv soj ntsuam rau tshooj 4:**

<https://svrirtc.instructure.com/courses/680365/assignments/5718760>

**Nias rau ntawm qhov txuas hauv qab no kom rov qab mus rau ntawm phab home page:**

<https://svrirtc.instructure.com/courses/250296>

## Lus Teb

### Rov xyuas dua

#### **IDEA**

1. Individuals with Disabilities Education Act.
2. Individual Education Plan.
3. 3-21.
4. Tus me nyuam kawm ntawv yuav tsum muaj ib tus mob xiam oob qhab THIAB yuav tsum yog xav kom tau kev pab kawm ntawv tshwj xeeb (special education) thiab lwm yam kev pab kom tau txais ib qho kev pab hais txog kev kawm ntawv los ntawm tsev kawm ntawv.

#### **ADA**

1. Americans with Disabilities Act.
2. Tsis yog, IEPs tsuas muaj nyob rau theem K-12 xwb.
3. Tsis hais leej twg uas muaj teeb meem mob rau lub cev los yog mob hlwb uas ua rau nws ua tsis tau ib txoj hauj lwm loj hauv lub neej los yog ntau txoj.
4. Tus neeg kheej.

#### **Sections 504/508**

1. The Rehabilitation Act.
2. Cov tsev kawm ntawv uas yog tsoom fwm li (public school districts), cov tuam tsev kawm ntawv qib siab (postsecondary institutions) thiab cov tswv hauj lwm.
3. Kev siv cov khoom electronic thiab information technology.
4. Thaum nws yuav ua rau tau ris lub nra (yuav raug nyiaj ntau heev los mus pauv qhov ntawd)

#### **Piv K-12 rau College**

1. Tus neeg kheej.
2. The Office of Civil Rights (OCR).
3. Tsis yog.
4. Tus me nyuam kawm ntawv / tus neeg ua hauj lwm.

## **Opening Doors – Appendix A**

1. IEP (Individualized Education Plan)
2. Individualized Education Plan
3. Lo lus teb raug rau qhov no yog c). Yog a los yog b.
4. Ib lub tsev kawm ntawv university los yog college twg uas tsis yog tsoom fwv li los yog tsoom fwv li (any private or public university or college).
5. Americans with Disabilities Act.
6. A) Tsis muaj cai cais (discriminate) yam tsis raws cai nyob hauv kev nrhiav neeg rau npe kawm (recruitment) college, kev cia kawm (admission) los yog tom qab cia kawm vim qhov tus me nyuam kawm ntawv muaj mob xiam oob qhab, B) kom yuav tsum muab cov kev pab uas haum rau tus me nyuam kawm ntawv, siv tau thiab tsis tau them nyiaj, C) yuav tsum muab kev hloov kho “raws li yuav tau ua” kom paub tseeb tias tsis muaj kev cais neeg yam tsis raws cai nyob hauv txoj kev kawm, D) qhia rau cov me nyuam kawm ntawv paub txog cov kev pab uas muaj rau lawv, cov kev hloov kho kev kawm ntawv thiab lub npe ntawm tus neeg khiav hauj lwm muab kev pab (coordinator of support services), thiab 5) yuav tsum muab cov ntaub ntawv uas sau tau qhia rau cov me nyuam kawm ntawv paub seb yuav ua li cas thiaj mus cuag tau cov kev pab (services) los yog thov kom muab cov kev pab (accommodations).
7. A) Koom rau hauv txoj kev npaj rau kev hloov mus tom ntej uas yog mus koom IEP cov rooj sib tham, pib txij thaum muaj hnuv nyoog 14 xyoo los yog qis dua, yog phim rau qhov no. B) tham nrog nws pab neeg hauv IEP los mus sib tham txog cov hauj lwm uas lub siab nyiam thiab npaj rau kev mus kawm ntawv qib siab (postsecondary education). C) kawm kom paub cov kev txawj muab tswv yim rau yus tus kheej. D) thaum muaj hnuv nyoog 18 xyoo lawm, cov me nyuam kawm ntawv uas muaj mob xiam oob qhab muaj cai tswj lawv kheej lub neej rau yav tom ntej (tshwj tias ntshe ho muab ib tus neeg muaj cai saib xyuas lawv no xwb). Txawm tias yuav muaj cov cai lij choj (504/ADA) tiv thaiv lawv thiab los, lawv muaj lub luag hauj lwm tswj hwm lawv tus kheej thaum nkag mus kawm rau hauv kev kawm qib siab.

8. **Tas nrho** txhua yam yog koj lub luag hauj lwm thaum koj hnuv nyoog nto 18 xyoos. To taub txog koj tus ob xiam oob qhab thiab muab kom tau cov ntaub ntawv tam sim no, muab tswv yim sawv cev koj tus kheej, hu rau cov neeg ua hauj lwm muab kev pab/kev pab rau tus mob xiam oob qhab nyob rau ntawm lub tsev kawm ntawv college/university, qhia rau cov kws qhia ntawv paub txog cov kev pab (accommodations) uas yuav tsum tau muaj rau koj thiab npaj kom tau cov kev pab ntawd uas tsis muaj nyob rau ntawm cov tsev kawm ntawv qib siab (postsecondary setting).
9. **Tas nrho tab sis c)** yog hais raug. Kev pab tswv yim tshwj xeeb, assistive technology, audio textbooks, thiab cov neeg teev ntawv, cov neeg nyeem ntawv thiab cov neeg txhais lus.
10. Kaum peb (13)
11. Kaum peb (13)
12. Nees nkaum ib (21)
13. Kaum rau (16)

Zoo tshaj plaws!